



**TERENGGANU DARUL IMAN
TAMBAHAN PERUNDANGAN**

AKTA KERAJAAN TEMPATAN, 1976

**Tr. P.U. 6/90
UNDANG-UNDANG KECIL TAMAN
(MAJLIS DAERAH SETIU) 1988**

Tarikh penyiaran:
Tarikh mula berkuatkuasa:

24 Mei 1990
24 Mei 1990



TERENGGANU DARUL IMAN
TAMBAHAN PERUNDANGAN
AKTA KERAJAAN TEMPATAN 1976

Tr. P.U. 6/90
UNDANG-UNDANG KECIL TAMAN (MAJLIS DAERAH SETIU) 1988

Tarikh penyiaran:
Tarikh mula berkuatkuasa:

24 Mei 1990
24 Mai 1990

SUSUNAN UNDANG-UNDANG KECIL

Mukadimah

- Undang-undang kecil 1. Nama, pemakaian dan mula berkuatkuasa.
- Undang-undang kecil 2. Tafsiran
- Undang-undang kecil 3. Kesalahan-kesalahan.
- Undang-undang kecil 4. Kemasukan anjing atau binatang.
- Undang-undang kecil 5. Menjerat atau membunuh binatang dan burung adalah dilarang.
- Undang-undang kecil 6. Kereta melebihi dua tan dilarang.
- Undang-undang kecil 7. Meletak kereta sembarangan dilarang.
- Undang-undang kecil 8. Kelakuan tidak sopan.
- Undang-undang kecil 9. Penutupan taman.
- Undang-undang kecil 10. Penalti.

Mukadimah

PADA menjalankan kuasa-kuasa yang diberi oleh seksyen 102 Akta Kerajaan tempatan 1976 [Akta 171], Majlis Daerah Setiu membuat, dan menurut seksyen 103 Akta tersebut Pihak Berkuasa Negeri Terengganu dengan ini mengesahkan, Undang-undang Kecil yang berikut:

1. Nama, pemakaian dan mula berkuatkuasa.

Undang-undang Kecil ini bolehlah dinamakan **Undang-Undang Kecil Taman (Majlis Daerah Setiu) 1988** dan hendaklah dipakai hanya bagi kawasan Majlis Daerah Setiu dan hendaklah mula berkuatkuasa pada tarikh ia disiarkan di dalam *Warta*.

2. Tafsiran.

Dalam Undang-undang Kecil ini melainkan jika kandungan ayatnya menghendaki makna yang lain—

“kereta motor” ertinya tiap-tiap jenis kereta yang digerakkan oleh jentera yang terdapat di dalamnya dan dibina atau disesuaikan supaya boleh digunakan di atas jalan, dan termasuklah trailer;

“struktur” ertinya apa-apa rumah, pondok, bangsal, gerai, papan tanda, khemah, warung, meja, tiang, tiang sandar, tempat berteduh, kepungan beratap atau apa-apa sambungan atau apa-apa bangunan lain dari apa-apa jua bahan;

“taman” termasuklah kawasan lapang, siar-kaki di tasik, taman rekreasi atau hiburan, bulatan, batasan tengah sepanjang jalan, sisian jalan, jalan rizab, anak sungai, sungai, tebing sungai atau mana-mana perkarangan yang disenggara atau di bawah bidang kuasa Yang Dipertua;

“Yang Dipertua” ertinya Yang Dipertua Majlis Daerah Setiu dan termasuk Timbalan Yang Dipertua.

3. Kesalahan-kesalahan.

Seseorang yang di dalam sesuatu taman yang—

(a) mengalihkan atau merosakkan apa-apa notis atau undang-undang kecil yang dipamerkan di dalamnya;

(b) membawa bersama-sama atau menampalkan atau menegakkan apa-apa bil, pelekat, notis, panji-panji, sepanduk atau iklan pada atau di atas sesuatu tembok, pokok, pagar atau struktur;

(c) menggunakan apa-apa pelaung, penguatsuara, sistem siaraya atau lampu-lampu;

(d) mengalihkan, memindah, merosakkan atau mencacatkan mana-mana tempat duduk, perkakas tempat permainan kanak-kanak atau lain-lain peralatan;

(e) menempatkan, melonggok atau membuang atau menyebabkan atau membenarkan ditempatkan, dilonggokkan atau dibuang apa-apa debu, abuk, kertas, abu, bangkai binatang, sampah, kotak, tong, bungkusan atau lain-lain artikel, atau menabur apa-apa abuk, pasir, tanah, batu kelikir, tanah gembur, batu, rumput, jerami, ketaman, abuk papan, sampah di kebun bunga, sampah di kandang kuda, sampah perdagangan, baja, sampah-sarap, atau apa-apa benda atau bahan lain daripada kereta yang bergerak atau tidak bergerak atau dengan apa-apa cara lain atau membuang, meninggalkan apa-apa botol, gelas, tin, pembalut makanan, sisa-sisa makanan atau apa-apa artikel atau barang lain;

(f) memanjat mana-mana tembok, pagar, struktur atau pokok;

(g) menunggang atau memandu basikal atau kereta motor di atas mana-mana rumput atau lorong kaki;

(h) berjalan di atas batas bunga atau pokok-pokok renek;

(i) memotong, mengalih, merosak atau memusnahkan mana-mana bunga, tempat duduk, tumbuh-tumbuhan atau pokok-pokok;

(j) mengalihkan mana-mana rumput atau mengorek mana-mana tanah;

(k) melontar atau membuang apa-apa batu atau lain-lain pelempar;

(l) mandi di dalam mana-mana kolam atau anak sungai kecuali di suatu tempat mandi yang ditetapkan oleh Yang Dipertua bagi maksud itu;

(m) mengalirkan atau menyebabkan dialir apa-apa benda buangan atau cecair buangan daripada mana-mana premis ke dalam sesebuah tasik atau anak sungai (dalam taman) dan yang mencemar atau mungkin mencemarkan tasik atau anak sungai itu;

- (n) menggunakan sampan, atau memancing di dalam mana-mana tasik atau anak sungai kecuali dengan kebenaran bertulis daripada Yang Dipertua atau mengganggu dengan apa-apa cara akan aliran air daripada mana-mana tasik yang melimpahi alur air;
- (o) memasang api atau membakar bunga api atau mercun atau menembak tanpa kebenaran yang sah apa-apa senjata api atau senapang angin tanpa mendapat kebenaran bertulis daripada Yang Dipertua terlebih dahulu;
- (p) bermain layang-layang atau apa-apa permainan bola kecuali di tempat-tempat yang diperuntukan dengan nyata bagi permainan itu;
- (q) berumur lebih daripada 12 tahun, menggunakan apa-apa perkakas tempat permainan kanak-kanak;
- (r) membasuh atau mengeringkan sesuatu atau menepuk apa-apa permaidani atau tikar;
- (s) menegakkan apa-apa struktur tanpa mendapat kebenaran bertulis daripada Yang Dipertua terlebih dahulu;
- (t) mendedah untuk jualan atau menjual apa-apa barang, benda atau makanan atau minuman kecuali di tempat-tempat di dalamnya dan pada sesuatu masa yang diluluskan oleh Yang Dipertua;
- (u) bersyarah atau menyampaikan apa-apa ucapan dihadapan khalayak ramai atau berkumpul di dalam taman bagi maksud mengadakan atau mengambil bahagian dalam apa-apa mesyuarat agama, politik atau apa-apa mesyuarat lain atau mengadakan sesuatu tunjuk perasaan tanpa mendapat kebenaran bertulis daripada Yang Dipertua terlebih dahulu;
- (v) menggunakan apa-apa bahasa yang lucah atau sumbang atau berkelakuan lucah atau sumbang;
- (w) menghalang Yang Dipertua atau mana-mana pegawai yang diberikuasa secara bertulis olehnya dalam menjalankan tugas-tugasnya; atau
- (x) menjaga atau membasuh kereta motor tanpa mendapat kebenaran bertulis daripada Yang Dipertua terlebih dahulu;

adalah bersalah atas suatu kesalahan.

4. Kemasukan anjing atau binatang.

- (1) Tiada seorang pun boleh menyebabkan atau membiarkan mana-mana anjing atau binatang lain kepunyaannya atau di dalam jagaannya masuk atau berada di dalam sesuatu taman.

(2) Jika suatu notis telah ditampalkan oleh Yang Dipertua melarang kemasukan anjing ke dalam sesuatu taman, tiada seorang pun boleh menyebabkan atau membiarkan mana-mana anjing kepunyaannya atau yang di dalam jagaannya masuk atau berada di dalam taman itu.

5. Menjerat atau membunuh binatang dan burung adalah dilarang.

Tiada seorang pun boleh menjerat atau membunuh mana-mana binatang atau burung di dalam sesuatu taman atau memiliki dalam sesuatu taman apa-apa alat atau alatacara untuk menjerat binatang atau burung, Yang Dipertua atau mana-mana pegawai yang diberi kuasa secara bertulis olehnya atau pegawai polis boleh mensita alat atau alatacara daripada mana-mana orang yang didapati berada dalam taman itu.

6. Kereta melebihi dua tan dilarang.

Tiada kereta motor atau basikal boleh diletak di mana-mana tempat dalam sesuatu taman kecuali di suatu tempat yang disediakan untuk meletak kereta motor atau basikal itu.

7. Meletak kereta sembarangan dilarang.

Tiada kereta motor atau basikal boleh diletak di mana-mana tempat dalam sesuatu taman kecuali di suatu tempat yang disediakan untuk meletak kereta motor atau basikal.

8. Kelakuan tidak sopan.

(1) Mana-mana orang yang didapati berkelakuan dengan cara tidak sopan dalam sesuatu taman adalah melakukan suatu kesalahan.

(2) Mana-mana orang yang melakukan apa-apa perbuatan yang menyalahi mana-mana daripada Undang-undang Kecil ini boleh diperintahkan keluar dari suatu taman oleh Yang Dipertua atau mana-mana pegawai yang diberikuasa secara bertulis olehnya atau pegawai polis dan boleh enggan diterima masuk kemudiannya.

(3) Mana-mana orang yang enggan mematuhi perintah di bawah perenggan (2) boleh diusir keluar dari taman itu dengan menggunakan kekerasan yang berpatutan.

9. Penutupan taman.

Yang Dipertua boleh menutup sesuatu taman atau mana-mana bahagian daripadanya pada bila-bila masa.

10. Penalti.

Mana-mana orang yang bertindak menyalahi mana-mana daripada peruntukan Undang-Undang Kecil ini adalah bersalah di atas suatu kesalahan dan apabila disabitkan boleh dikenakan denda tidak lebih daripada dua ribu ringgit atau penjara selama tempoh tidak lebih daripada satu tahun atau kedua-dua denda dan penjara dan mengenai kesalahan yang berterusan sejumlah wang tidak lebih daripada dua ratus ringgit bagi tiap-tiap satu hari dalam masa kesalahan itu berterusan setelah disabitkan.

Diperbuat oleh Majlis Daerah Setiu dalam mesyuarat pada 29 Februari 1988.
[MDS. 3 /6 /4-(2)]

DATO' HAJI TENGGU MAHMUD BIN MANSOR,
Yang Dipertua,
Majlis Daerah Setiu

Disahkan oleh Pihak berkuasa negeri di dalam mesyuarat pada 6 November 1989.
[SUK. TR. 1200/367/SK. A; PUN. TR. 70 Bhg. 3]

OSMAN BIN MUDA,
Setiusaha,
Majlis Mesyuarat Kerajaan Negeri,
Terengganu